

Ka Nupepa Kuokoa, Volume LXV, Number 28, 15 July 1926 — KA PAPA HIMENI KAULANA O KAUI, I KE KAI MALINO O KONA. [ARTICLE]

[Back](#)

KA PAPA HIMENI KAULANA O KAUI, I KE KAI MALINO O KONA.

Mr. Lunahooponopono, Welina kua:—E oluolu mai i kekahi wahi kaawale o ke Kilohana, no na mea hou i ka wa i hiki mai ai ka Papa Himeni o Kauai i na Kona nei. Iwaena o na Papa Himeni i hiki mai i ke kai malino nei a Ehu, a i himeni ae ma kekahi mau wahi, me he mea ala o ka Papa Himeni mai Kauai mai, ka ano'i a na kupa o ka aina.

I ke ahiahi Poono, Iune 19, maloko o ke kula kiekie o Konawaena i wehe ae ai i ka lakou ahamele, i hele a piha pono kela holo nui. Aole i manaoia e piha ana, oiai e noho ana ka Aha Kula Sabati me C. E., ia wa ma Mokuaikaua, eia nae, ua kuhihewa ia manao ana, oiai e ake ana ka lehulehu o na

Kona nei e lohe i keia mau himeni nana i hookaulana i keia papa himeni ame kona alakai Mr. Henry Waiau, ia "Lei ana i ka Mokihana, a me "Kona Kai Opua".

Ua meleia mai keia mau himeni hooni i ka manao, "Hanohano Hanalei a me Hanalei Bay", a ua lilo ke kulana hoomahie o Mr. Alfred Alohikea i mea hooialaai nui ia. I ka himeni "Lei ana i ka Mokihana" ua hoike mai keia papa himeni i ko lakou haaheo i ko lakou mokupuni me ke kuahiwi o Waialeale e Lei ana i ka Mokihana, a i ka lohe ana aku i kela leo ui o Mrs. Sheldon, aohē mea a ka manao e wae iho ai.

I ke meleia ana o "Kona Kai Opua", me na wahi pana kaulana i hakuia me ka mikioi a noeau, ua kailiia aku ka puuwai o na kupa o ka aina, a hiki ole ke kaohi iho i na manao mahalo, me he make-neki la e ume aku ana, a paa ole na wahi kenikeni iloko o na eke. He nani maoli no.

I ka paina i haawiia ai ma ka hale uwapo o Hookena, no ka hanohano o Mr. Henry Waiau a me na hee o ka papa himeni i June

24, i mele hou ia ai kela mau himeni, a i ke meleia ana mai o Kona Kai Opuia, ua hiki ole i ke anaina ke noho malie, oiai ka i'a kaulana oia aina aloha ua haku ia iloko o ke mele, "Ka pewa o ka manini, he niniu mai hoi kau me ka eha koni." Ua hoopaiia aku ka puuwai o na kupa o ka aina, a he lele wale no na ke dala, paa ole iho i ke kaohi mai. O Hookena ke one hanau o Mr. Henry Waiiau, a ua haawi aku na kupa i na mahalo kiekie loa.

Ma ka aha hoolaula i ke ahiabi Poalima Iune 25, ma Mokuiaikaua i mele hou ia mai ai kela mau himeni nani, i hiki ole ai i na kupa o Kailua ke kaohi iho i ke pana a ka puuwai, no ka mea, "He aina wela o Kailua, a he eka ka makani e olu ai." Ua nui maoli ka paipai a me ka mahalo o ke anaina, i hooialoia ma ka lulu ana. Ma ka hoomaopopo aku ina sole ka papa himeni o Kauai, ina ua pamalo kela aha hoolaula.

Ma ka uwapo o Kailua mamua o ke kau ana i ka waapa, i mele hou mai ai keia papa himeni i kela

mau himeni nani no ka wa hope
loa, a kau aku no ka oneki o ka
Maunakea no ka huli hoi ana i ka
home.

Ua lilo keia mau himeni elua a
Mr. Henry Waiiau i haku ai i mea
nona e kaulana ai. He alakai hi-
meni makaukau, a he haku mele
noeau, e pono ai ke kapaia, Porope-
ka Henry Waiiau.

Pomaikai oe e Kausi i keia Ha-
waii makaukau, a kakou e na ku-
pa o ka aina e haheo ai.

Me ka mahalo i ka Lunahoo-
ponopono,

KE KAI MALINO A EHU.

This article has been automatically clipped from the Ka Nupepa Kuokoa 15 July 1926, organised into a single column, then optimised for display on your computer screen. As a result, it may not look exactly as it did on the original page. The article can be seen in its original form in the [page view](#).